

# ЯСАУИ МҰРАСЫ

Республикалық мәдени-танымдық газеті №12 (33) қараша 2019 жыл Газет 2016 жылғы 14 қазаннан бастап шыға бастады

## «ТҮРКІСТАН – ЕЛІМІЗ ҮШІН МАҢЫЗДЫ ҚАЛА»



Қазақстанның Тұңғыш Президенті – Елбасы Нұрсұлтан Назарбаев Түркістан облысына жұмыс сапары аясында халықаралық туризмге сұранып тұрған мәдени-ағарту нысандарының құрылыстарымен сондай-ақ Қожа Ахмет Ясауи кесенесіне жақын орналасқан саябақтар мен «Күлтөбе» қалашығы негізінде ашылар археологиялық парктің жоспарымен танысты.

Елбасы Шығыс Қазақстан облысы Түркістанға тарту еткен әуенді субұрқак орналасқан жаңа алаңда қала жұртшылығымен кездесіп, облыс орталығының алдағы уақытта көркейіп, дами беретінін атап өткен. «Терең тарихқа үңілетін болсақ, бұл – қасиетті өңір, киелі жер. Жиырма бір ханымыз жерленген, сұлтандарымыз бен әулиелер мәңгілік тыныштық тапқан өте киелі орын.

Тәуелсіздік алғаннан кейін, әрине мен көне шаһарға ерекше назар аудардым. Тіпті астананы таңдаған кезде де біраз ойландым. Бірақ оған жағдай болмады, өздеріңіз білесіздер.

Міне, енді уақыты келді. Түркістан қаласын облыс орталығы етіп, қайтадан жандандырып, елімізге осы киелі орды қайтару мүмкіншілігі туды. Бұл қала бүкіл Түркі дүниесінің орталығы екені бәрімізге белгілі. Көрші ағайындар Өзбекстан, Қырғызстан, Түрікменстан қуанып жатыр. Олар да атсалысып, бізге көмектеседі деп сенемін. Түркістан шаһары алдағы уақытта ірі мегаполиске айналады. Осыдан біршама жыл бұрын Түркістанның 1500 жылдығын атап өтеміз деп біраз шаруаны атқарған едік. Сонда осы алаңда кездесіп, сөйлескенбіз. Сол кезде Түркістан орталық болады деп айтқанмын.

Мінекі, былтыр мен тарихи Жарлыққа қол қойдым деп тебірене толғанған Елбасы

бүгінде облыс орталығында құрылыс қарқын алғанын, оның ішінде Қожа Ахмет Ясауиге, Қазақ тарихына, Түркі тарихына байланысты нысандар салынып жатқанын да ризашылық сезіммен атап өтті. «Бұл өңірде туризмнің дами түсетініне сенімдімін. «Түркістанда бірнеше кезеңде 175 ғимарат салу жоспарланған. Соның 102-сі биыл іске қосылады. Жұмыстың қандай қарқынмен атқарылып жатқанын көріп отырсыздар. Бұл үшін мен осы жерде барлық облыстардың басын қостым. Қолынан іс келетін азаматтар өз шаруасын дөңгелетіп өкетеіп жатыр. Болашақта әдемі қала болады, халық саны өседі. Қазір қала тұрғындарының саны 170 мың болса, меніңше аз уақыттың ішінде жарты миллионға жетеді. Кейін одан сайын көбейеді деп ойлаймын», деді Елбасы.

→2



## МИНИСТР МӘДЕНИЕТ САЛАСЫ ҚЫЗМЕТКЕРЛЕРІМЕН КЕЗДЕСТІ

Мемлекет басшысы Қасым-Жомарт Тоқаевтың «Сындарлы қоғамдық диалог – Қазақстанның тұрақтылығы мен өркендеуінің негізі» атты Қазақстан халқына арнаған Жолдауын іске асыру жөнінде министрлік тарапынан қолға алынған шаралар туралы баяндаған Ақтоты Рахметоллақызы мәдениет саласы қызметкерлерінің жалақысын көтеру, бұқаралық спортты дамыту, туризм саласын жандандыру, шетелден келетін туристердің Қазақстанға визасыз кіру мәселелеріне тоқталып өтті.

«Мәдениет саласына тікелей қатысы бар адам ретінде, жалақыны арттыру мәселесінің шешілуін қаншалықты күткенімізді түсінемін. Бұдан басқа, әлеуметтік жеңілдіктер мәселесі де пысықталуда. Мәдениет және спорт министрлігі меморандумдар әзірлеп, әкімдіктерге жіберді, оларды орындау үшін әлеуметтік қолдау шараларын, оның ішінде мәдениет және өнер қызметкерлерінің тұрғын үй жағдайын жақсартуды қамтитын салалық жоспарлар бекітілетін болады», деді министр.

Сондай-ақ еліміздегі туризмді одан әрі дамыту үшін Түркістан облысында қолға алынған жобалар жайы да сөз болды.

«Түркістан – болашақ туристік аймақ болатын тағы да бір облыс. Бұл түркі халықтарының тарихи және рухани орталығы. Мемлекет басшысының тапсырмасы бойынша ортағасырлық Түркістан қалашығын қалпына келтіру жөнінде белсенді түрде жұмыстары жалғасуда. Қайта құру нәтижесінде келушілер мен туристер саны миллионға дейін артады, ал олардың өңірде болу уақыты бірнеше сағаттан бірнеше күнге дейін артады деп күтілуде. Бұл облыс экономикасына қомақты қаржы құюды қамтамасыз етеді. Сондай-ақ «Отырар» қалашығын ірі туристік жоба ретінде қалпына келтіру жобасының тұжырымдамасы әзірленді. Жыл соңына дейін «Отырар» сапар орталығы ашылады. Ал келесі жылы «Әзірет Сұлтан» мемлекеттік тарихи-мәдени қорық-музейіне қарасты Гауһар ана кесенесі мен ортағасырлық Сауран қалашығында Сапар орталығы бой көтереді», – деді Ақтоты Рахметоллақызы.

Жиынға қатысқан мәдениет саласы қызметкерлері де ұсыныс-пікірлерімен бөлісті.

Ақын, сазгер Әбдіхалық Әбдірайымовтың хақим Абай Құнанбайұлының 175 жылдық мерейтойына орай жазушы Мұхтар Әуезовтің табыны тиген сырлы Созақ жерінен Семейге мәдениет және өнер керуенін ұйымдастыруға арналған ұсынысына алғысын білдірген министр Әбу Насыр әл-Фарабидің 1150 жылдық мерейтойын атап өтуге де айрықша тарихи бастамалар қажеттігін айтты.

## ЖҮЙРІКТЕН ЖҮЙРІК ОЗАР ЖАРЫСҚАНДА

«Әзірет Сұлтан» мемлекеттік тарихи-мәдени қорық-музейі және Қожа Ахмет Ясауи атындағы Халықаралық қазақ-түрік университетінің ұйымдастыруымен дәстүрлі «Ясауитану-2019» республикалық байқау болып өтті. Іс-шара Елбасымыз Н.Ә.Назарбаевтың «Болашаққа бағдар: рухани жаңғыру», «Ұлы даланың жеті қыры» бағдарламалық мақаласында көрсетілген «Ұлы даланың ұлы есімдерін» ұлықтау мақсатында және Жастар жылына орай ұйымдастырылды.



Байқау шымылдығын «Әзірет Сұлтан» мемлекеттік тарихи-мәдени қорық-музейінің директоры Нұрболат Ахметжанов пен Қожа Ахмет Ясауи атындағы Халықаралық қазақ-түрік университетінің Әлеуметтік қолдау және тәрбие жөніндегі вице-президент Әміреқұл Ерғешұлы ашты.

Өз заманында-ақ халықтың ерекше илтипатына ие болып, әулиелер сұлтаны атанған, кейінгі ұрпақтың да руханият әлеміндегі бағдарын айқындауда жетекші рөл атқарған Қожа Ахмет Ясауи артына баға жетпес байлық, өшпес мұра қалдырып кеткені белгілі.

→2

## МУЗЕЙ САНЫ МОЛАЯ ТҮСТІ

«Әзірет Сұлтан» мемлекеттік тарихи-мәдени қорық-музейіне қарасты Рәбия Сұлтан Бегім кесенесі музейлендіру жұмыстарынан соң, келушілерге есігін айқара ашты.

Музейлендіру барысында кесене ішінде арнайы орындықтар қойылып, тұлғалар жайлы мәліметтер мен төл жәдігерлері орналастырылған.

Кесене ішінде арнайы орындықтар қойылып, тұлғалар жайлы мәліметтер мен төл жәдігерлері орналастырылған.

Қожа Ахмет Ясауи кесенесінен 50-60 метрдей жерде орын тепкен архитектуралық өзгешелігімен ерекшеленетін күмбезді Рәбия Сұлтан Бегім ғимараты ортағасырлық сәулет өнері ескерткіші қатарына жатады. Әмір Темірдің немересі, Ұлықбектің қызы, Әбілқайыр ханның әйелі, белгілі хандар Көшкінші мен Сүйініштің анасы Рәбия Сұлтан Бегімге арнайы тұрғызылған. Құлпытасы Қожа Ахмет Ясауидің кесенесінен табылған. Құлпытаста Рәбияның Әмір Темірдің ұлы Ұлықбектің қызы екендігі, 1485 жылы қаза болғандығы жазылады. Алғашында 8 бұрышты бір камералы, цилиндр тәрізді



барабанға бекітілген биік күмбезі бар құрылыс ретінде салынып, кейіннен көп камералы шаршы жоспарлы құрылыстармен толықтырылған кесене ішінде Рәбия Сұлтан Бегім, немересі Келді Мұхаммед

Сұлтан Сүйінішқожаұлы, шөберелері Мәстүра ханым Келді Мұхаммедқызы, Мұбарак Шах Келдімұхаммедұлы, Құл Мұхаммед Сұлтан Келді Мұхаммедұлы жерленген.

ҰЛЫ ДАЛАНЫҢ ЖЕТІ  
ҚЫРЫ – ҚАЗАҚ  
ХАЛҚЫНЫҢ РУХЫН  
ТІРІЛТҮДІҢ ТАРИХИ  
ФЕНОМЕНІ

→2

САЛТ-ДӘСТҮР  
САБАҚТАСТЫҒЫ

→3

КАТТА ЛАНГАР  
ҚҰРАНЫ

→4





